



Komunikadu Imprensa
Tribunál Distritál Suai
09 Novembru 2020

Prokuradór tenke eskolla artigu apropiadu antes akuza arguidu ba krime violasaun seksuál ne'ebé akontese entre membru família

Prokuradór tenke eskolla artigu sira apropiadu antes akuza arguidu ne'ebé komete krime violasaun seksuál iha ámbitu familiar ka relasaun família. Nune'e bele asegura sentensa ne'ebé justu tuir krime nia gravidade.

JSMP nia pedidu ne'e relasiona ho prokuradór nia akuzasaun iha kazu violasaun seksuál ne'ebé komete husi avo mane (arguidu) hasoru nia bei-oan rasik (lezada) ho idade tinan 18 ne'ebé ba hela provizoriu iha arguidu nia uma tanba lezada nia avo fetu moras no nia oan fetu lori tiha ba hela hamutuk ho nia oan fetu hodi konsulta. Kazu ne'e julga iha tribunál móvel iha Distritu Bobonaro, iha 21 Outubru 2020.

Iha kazu ne'e prokuradór akuza deit arguidu ho krime violasaun seksuál tuir artigu 172 Kódigu Penál (KP) maibé la akuza tan arguidu ho artigu 173 pontu (a) KP kona-ba agravasaun. Iha artigu 173 pontu (a) KP hateten katak krime violasaun seksuál agrava kuandu ajente sira ne'ebé halo agresaun seksuál abuza nia autoridade mai husi relasaun familiar, tutelár ka kuratelár, dependénsia ierarkika, ekonómika ka laborál. Iha kazu ida ne'e, ajente ka arguidu iha relasaun familiar ho lezada ka arguidu nu'udar lezada nia avo mane rasik. Nune'e hahalok arguidu nian ne'e tenke agrava tuir artigu 173 pontu (a) KP.

“Prokuradór tenke eskolla artigu sira apropiadu hodi promove akuzasaun ne'ebé di'ak nune'e bele ajuda tribunál hatur desizaun ida ne'ebé justu no adekua,” dehan Diretora Ezekutiva JSMP, Sra. Ana Paula Marçal.

Prokuradór akuza katak iha 23 Setembru 2018 iha oras kalan, arguidu haruka lezada atu toba ho arguidu iha arguidu nia kuartu, maibé lezada lakohi. Tuir mai, iha 25 Setembru 2020, iha tuku 07:00 dadeer, bainhira lezada prepara hela atu ba eskola, arguidu bolu no hateten ba lezada dehan “*ita rua ba to'os lalais lai*”, maibé lezada hatan nia atu ba eskola. Arguidu kontinua obriga lezada, tanba ne'e lezada haruka arguidu ba uluk to'os mak lezada tuir.

Arguidu la konsege ba to'os no haruka fali lezada atu hatun naan ne'ebé tara hela iha arguidu nia kuartu laran hodi halo modo. Lezada mós tama ba arguidu nia kuartu laran atu foti naan refere maibé arguidu tuir husi lezada nia kotuk no ho obriga halo relasaun seksuál ho lezada. Iha momentu halo hela relasaun seksuál ne'e, lezada bosok arguidu katak ema mai nune'e arguidu mós haksoit tun no halai sai tiha ba liur. Lezada

aproveita situasaun ne'e hodi halai ba hato'o akontesimentu ne'e ba lezada nia inan-aman.

Prokuradór akuza arguidu kontra artigu 172 KP kona-ba krime violasaun ho moldura penál tinan 5 to'o 15 prizaun.

JSMP rekomenda ba prokuradór hodi husu ba tribunál atu uza tan artigu 173 pontu (a) KP kona-ba agravaasaun. Maibé karik prokuradór la konsege husu, JSMP rekomenda ba juis koletivu atu antes deside kazu ne'e, presiza inklui tan artigu refere hodi agrava arguidu nia hahalok nune'e bele aplika pena ida ne'ebé justu no refléta duni gravidade husi krime ne'e.

Kazu ne'e rejistu iha tribunál ho Nú. Prosesu 0022/18 BBCLC no sei kontinua prosesu iha 23 Novembru 2020, iha Tribunál Distritál Suai.

Julgamentu kazu ne'e prezide hosi juis koletivu Dr. José Maria de Araújo, Dr. Nasson Mário Armindo Marques Doutel no Dr. Benjamin Barros. Ministériu Públiku representa hosi Dr. Rafael Jeronimo Gusmão no arguidu hetan defeza hosi Dr. Angelmo Pinto husi Defensória Públiku.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Email: ana@jsmp.tl

Telefóne: 3323883 | 77040735

Website: <http://jsmp.tl>